

Suleriaasissaq

uani

Kommunalbestyrelse





Kommune Kujalleq
Postboks 514 · 3920 Qaqortoq

Ingerlatsivik aalajangiisinnaassusilik.
Kommunalbestyrelse

Ulloq allannguiffik kingulleq.
21.03.2022

Inatsit tunngavissaq.
Inatsisartut inatsisaat nr. 29, 17. november 2017-meersoq, § 1, imm. 3.

Attaviit
Apequtissaqaruit nalorniguilluunniit uunga attaveqarit:

Allattoqarfik | Sekretariatet

Allattoqarfik@kujalleq.gl



Kommunalbestyrelsip suleriaasia

Kommunit aqunneqarnerat pillugu Inatsisartut Inatsisaat nr. 29 17. november 2017-imeersumi § 1, imm. 3 naapertorlugu aalajangersarneqarpoq:

Kommune Kujallermi kommunalbestyrelsip suleriaasia:

Kommunalbestyrelsip ataatsimiittarneri

§ 1. Kommunalbestyrelsip ataatsimiinneri tamanut ammasuupput. Taamaattorli kommunalbestyrelsi aalajangersinnaavoq suliassat ataasiakkaat matoqqasumik ataatsimiinnermi oqaluuserineqarnissaat.

Imm. 2. Pisuni ataasiakkaani kommunalbestyrelsi allamik aalajangiisimangippat suliat tulliuttut matoqqasumik oqaluuserineqartassapput:

- 1) Suliassat, inunnut ataasiakkaanut tunngasunik naliliisoqassatillugu
- 2) Suliassat illusinermut imaluunniit tunisinermut tunngassuteqartut
- 3) Missingersuutit imaluunniit neqeroorutit sanaartornermut tunngasut tunniutassallu

Imm. 3. Borgmesteri imaluunniit kommunalbestyrelsi tamatuminnga aalajangiippata suliaq matoqqasumik oqaluuserineqassanersoq matoqqasumik oqaluuserineqaaqqaassaaq.

Imm. 4. Suliassat matoqqasumik ataatsimiinnermi sularineqartussat ajornartinnagu kingulliullugit sularineqartassapput.

Imm. 5. Kinaluunniit kommunalbestyrelsip tamanut ammasumik ataatsimiinneranut eqqissisimasumik torersumillu tusarnaarsinnaavoq. Tusarnaartoq oqallinnernik akornusersuippat borgmesterip taanna



aneqqusinnaavaa, pisariaqarsoriguniulluunniit tusarnaartut tamaasa aneqqusinnaallugit. Borgmesterip tusagassiortut aallartitaasa immikkut ittumik inissaqartinneqarnissaat inniminnernaavaa.

Imm. 6. Kommunalbestyrelsip, kommunalbestyrelsip ammasumik ataatsimiinnerisa TV-kkut aallakaatinneqarnissaat imaluunniit radiukkoortinneqarnissaat akuerisinnaavaa.

§ 2. Ilaasortaq kommunalbestyrelsip ataatsimiinnissaanut peqataasinnaangikkuni sapinngisamik ataatsimiinnissap ingerlanneqarnissaanut ullut marluk sioqqullugit tamatumingna nalunaaruteqassaaq. Ilaasortat sorliit peqataasimanginnersut ataatsimiinnerni tamani imaqarniliamut ilanngunneqartassapput.

Oqaluuserisassat nassiunneqartarnerat suliallu saqqummiunneqartarnerat

§ 3. Kommunalbestyrelsimut ilaasortat kommunalbestyrelsimut siunnersuuteqarsinnaaput, siunnersuutit borgmesterimut nassiunneqartassapput, taassumalu oqaluuserisassat ataatsimiititalianut attuumassuteqartunut suliasanngorlugit ingerlateqqittassavai.

Imm. 2. Borgmesterip ileqquusumik ataatsimiinnissamut kingusinnerpaamik ullut arfineq-marluk sioqqullugit ilaasortanut tamanut oqaluuserisassanik nassiussinissani isumagissavaa. Ataatsimiinnermi atortussat ataatsimiinnermi atortorissaarummut "First Agenda"-mut borgmesterip allattoqarfianit nassiunneqartassapput.

Imm. 3. Immikkut ittumik ataatsimiinnissamut ataatsimiigiaqqusinnermi borgmesteri suliasanik ataatsimiinnermi suliarineqartussanik sapinngisamik tamaat ilaasortanut ilisimatitsissuteqassaaq.

Aalajangiisinnaatitaaneq, ataatsimiinnermik aqutsineq suliallu saqqummiunneqartarneri.



§ 4. Kommunalbestyrelsi ikinnerpaamik ilaasortat affaat peqataappata aalajangiisinnaassuseqarpoq. Ilaasortamit noqqaassuteqarneratoqarneratigut attaveqaatit atorlugit ilaasortap peqataasinnaaneranik kommunalbestyrelsi aalajangiisinnaavoq.

Imm. 2. Borgmesteri, taannalu peqataasinnaatinagu borgmesterip tullia siulleq (aappaaluunniit), kommunalbestyrelsip ataatsimiinnerinik siulersuisarpoq. Suliarineqartut siulersorneqarneranni apeqqutini tamani Borgmesteri aalajangiisarpoq, ataatsimiinnerullu torersumik ingerlannissaa nakkutigissallugu. Taamatuttaaq oqaluuserisassat sorliit taasissutigineqassanersut borgmesterip oqaasertalersortassavai.

Imm. 3. Kinaluunniit oqaaseqarusuttoq borgmesterimut saaffiginnissaaq, taassumalu oqaaseqarumallutik nalunaartut tulleriinneri malillugit oqaaseqartittassavai. Arlallit oqaaseqarumallutik ataatsikkut nalunaarpata borgmesterip aalajangertassavaa qanoq tulleriinneqarlutik oqaaseqassanersut. Oqaaseqartut taamaallaat borgnesterimit unitsinneqarsinnaapput.

Imm. 4. Ilaasortaq kinaluunniit pisariaqartitsineq naapertorlugu torersuunissamik borgmesterip aalajangiinerinik malinnittussaataavoq. Ilaasortaq ataatsimiinnermi ataatsimi marloriarluni torersumik pissuseqarnissamik peqquneqareersimappat borgmesterip siunnersuuteqarneratigut ilaasortaq ataatsimiinnermi tassani kommunalbestyrelsimit oqaaseqaaqusaanngissinnaavoq.

Imm. 5. Oqaluuserinninnermut atasumik siunnersuutit tamakkerlutik borgmesterimut saaffiginnissutigineqartassapput. Borgmesterip tamatumunnga pissutissaqarsorippagu, imaluunniit ilaasortat pingasut tamatuminnga noqqaassuteqarpata, taava oqallinnerup inaarneqarnissaanik taasisitsisoqassaaq.

Imm. 6. Borgmesteri apeqqutini taassumanga aalajangiiffigisassaataasunik kommunalbestyrelsimit aalajangiiffiginnitsitsisinnaavoq.



§ 5. Suliassat ataatsimiinnermi oqaluuserineqassapput borgmesterip tulleriinnilersuina malillugu, taamaalillunilu oqaluuserisassanut takussutissiami tulleriinnilersuineq saneqqussinnaallugu.

Imm. 2. Ataatsimiinnerup aallartinnerani ilaasortaq kinaluunniit oqaluuserisassanut oqaaseqarusulluni piunasaqarsinnaavoq, suliassanik sularinninnissamat tulleriiaarsimanerat pillugu apeqqutip eqqarsaatigineqarnera aamma matoqqasumik sularinninnissamiit tamanut ammasumik sularinninnissamat paarlattuanullu ilanngullugu.

§ 6. Suliassaq ataaseq ataasiaannarlugu sularineqassaaq, inatsisiliornermi immikkut ittumik allatut aalajangiisoqarsimanngippat imaluunniit kommunalbestyrelsip marloriarluni sularineqassasoq akuersissutigisimappagu. Kommunip aqutsinermut ileqqoreqqusaa ukiumullu missingersuutit marloriarneqassapput.

Imm. 2. Siullermeerinninnermi missingersuutit sukumiisumik oqaluuserineqartassapput, appassaaneerinninnermili ataatsimuunerusoq oqaluuserineqassapput, taavalu aningaasaliivissat kommunalbestyrelsip isummerfigisariaqagai pillugit taasisoqartassalluni.

Imm. 3. Siullermeerluni oqaluuserinninnermi suliap suussusia taasissutigineqassanngilaq, taamaallaat aappassaaneerlugu suliassatut ikaarsaartinneqarnissaanik apeqqut. Suliamut saqqummiunneqartumut, kommunalbestyrelsimit suliassap aappasaaniigassanngortinneqarnissaanik aalajangiisoqartinnagu, ilaasortaq kinaluunniit oqaaseqarumanissaminut pisinnaatitaavoq. Siullermeerlugu aamma aappassaaneerlugu sularinninnerit akornanni sivikinnerpaamik akunnerit 24-it ingerlareersimassapput. Kisianni qqutsinissamik ileqqoreqqusap ukiumullu missingersuutit siullermeerlugit aamma aappassaaneerlugit sularineqarnerisa akornanni sivikinnerpaamik ullut 14 ingerlaqqaarsimassapput.

Imm. 4. Suliassaq marloriarlugu oqaluuserisassanngortinneqarpat tassunga pappiaqqat paasissutissanik imallit siullermeerlugu sularineqarnerata kingorna sularineqarsimasut sapinngisamik ilaasortanit takuneqarsinnaasunngorlugit



saqqummiunneqartassapput, imaluunniit taakkua akornanni
kaajallaasinneqassallutik.

§ 7. Kommunalbestyrelsip aalajangersinnaavaa suliassaq, ataatsimiititap aalajangersimasup susassaqarfianut attuumassuteqanngitsoq, ataatsimiititamut ataavartumut innersuussutigineqassasoq.

Imm. 2. Kommunalbestyrelsi isumaqarpat suliassaq kommunalbestyrelsimit aalajangiiffigineqannginnermini ataatsimiititami immikkut ittumi oqaluuserineqaqqittariaqartoq, pisumi ataatsimi tassani ataatsimiititaq taamatut ittoq pilersinneqassaaq ataatsimiititalu ilaasortaasa amerlassusissai kommunalbestyrelsimit aalajangersarneqarlutik.

Imm. 3. Immikkut ataatsimiititaliaq nammineq siulittaasussamik qinersisussaq allaganngorlugu nassuiaasiussaaq Borgmesterimut ingerlasussanngortitamik, taassumalu taanna Kommunalbestyrelsimut ilaasortaanut agguaatissavaa.

Ilaasortat oqaluuserinninnermi taasinermilu peqataasernerat

§ 8. Kommunalbestyrelsip aalajangissavaa ilaasortap suliamut attuumassuteqarnera peqqutaalluni, sullissinermut inatsimmi §§ 3 aamma 4 naapertorlugit kommunalbestyrelsip suliaq pillugu isumaqatiginninniarnannut taasinerannullu peqataasinnaatinneqassannginnersoq. Suliap saqqummiunneqarnerani, isumaqatigiissutiginiarneqarnerani taasissutigineqarneranilu pineqartoq ilaasinnaanngippat ataatsimiittarfimmiissanngilaq. Ilaasortarli kommunalbestyrelsip suliamut pineqartumut peqataasinnaassuseq pillugu isumaqatiginninniarnannut taasinerannullu peqataasinnaavoq.

Imm. 2. Ilaasortap pissutsinik suliassanilu aalajangersimasuni inuttut soqutigisaqarnini pissutigalugu ataatsimiissutiginninnerni taasineranilu peqataasinnaanernimut nalornisoornartoqartillugu kommunalbestyrelsi ilisimatissavaa.



Imm. 3. Nunaqarfiit kommunalbestyrelsi sinniisumik aggersaaqqaarnani ilaasortap suliami peqataasinnaanginnera aalajangerpassuk, ilaasortap peqataasinnaangitsup qinigaaqatigisimasaasa, imaluunniit peqataasinnaangitsoq nammineq kisimiilluni qinigaasimasuuppat, suliap ataatsimiinnissamut tulliuuttumut kinguartinneqarnissaa piumasarisinnaavaa, kisianni aatsaat kinguartitsineq piffissaliussanik kommunalbestyrelsip malittariaqagaanik qaangiinermik kinguneqassangippat. Taamaattoq kinguartitsisoqarsinnaangilaq ilaasortat najuuttut 2/3-sa tamanna akerlerippassuk, imaluunniit kinguartitsinissap nassatarissappagu piffissarititaasut kommunip malissallugit pisussaaffii qaangerneqassappata.

§ 9. Ilaasortat nunaqarfiit aqutsisuisa taasinerannut taamaallaat ilaasinnaapput, taasineranut najuukkunik imaluunniit attaveqaatit atorlugit ataatsimiinnermut peqataagunik.

Taasinerit, allannguutissanut aamma ilaannakortumik allannguutissanut siunnersuutit

§ 10. Taasineq pisassaaq ilaasortat nikuinnerisigut imaluunniit nappaanerisigut.

Imm. 2. Aalajangiinerit tamarmik amerlanerussuteqarneq naapertorlugu aalajangerneqartassapput, tassa inatsimmi allanik allasimasoqangippat.

Imm. 3. Borgmesterip nalilerpagu, suliap inernera qularutissaanngingaarmat taasinissaq pisariaqangitsoq, taava taamatut paasinninnini oqaatigeriarlugu suliamut tunngatillugu qanoq aalajangiisoqassanersoq oqaatigisassavaa. Tamatuma kingorna ilaasortat arlaannaalluunniit taasisitsinissamik piumasaqaateqangippat borgmesteri nalunaaruteqassaaq nammineq paasinninnini naapertorlugu oqaatigisamisut suliasaq aalajangiivigineqartoq.

Imm. 4. Allakkatigut qinersisoqassatillugu allagartat qinersiffissat atorneqassapput borgmesterimillu agguanneqarlutik. Borgmesteri isumaqarpat ilimagineqarsinnaasoq kommunalbestyrelsi qinigassanngortittumik aalajangersimasumik toqqaaniartoq imaluunniit toqqaqqinniartoq, taava siunnersuutigisinnaavaa *pineqartoq* allaganngorlugu taasinerataqangitsumik



toqqarneqassasoq. Tamatuma kingorna ilaasortat arlaannaalluunniit taamatut taasisoqarnissamik piumasaqaateqanngippat, qinigassanngortitaq siunnersuutigineqartoq qinigaasutut isigineqassaaq.

§ 11. Taasineq aallartissimatinnagu allannguutissatut allannguutillu ataanni allannguutissatut siunnersuutit saqqummiunneqarsinnaapput, aammalu suliani marloriarlugit suliarineqartussani siullermeerluni suliarinninnermi saqqummiunneqartariaqanngillat imaluunniit sammineqartariaqaratik, taamaattorli imm. 2 takuuk.

Imm. 2. Kommunalbestyrelsi suliassat marloriarlugit suliarineqartussat eqqarsaatigalugit aalajangiisinnaavoq allannguutissatut siunnersuutinik aamma allannguutigiteqqitassatut siunnersuutinik saqqummiinissamut piffissaqartitsisoqassasoq, taamaattoqassappallu piffissaritinneqartup kingorna saqqummiunneqarsinnaanngitsut.

Imm. 3. Allannguutissatut siunnersuut aamma allannguutigiteqqitassatut siunnersuut aappassaaneerlugu suliarineqarnissaa sioqqullugu ilaasortanut ilisimasassatut tunniunneqarsimannngippat, isumaqatigiinniarnep aallartinnerani borgmesteri siunnersuutit pillugit nalunaaruteqassaaq, tamatumani apeqqutaassalluni pappiaranngorlugit tunniunneqarsimanersut. Borgmesterip aalajangissavaa allannguutissatut siunnersuutit qanoq tulleriinneqarlutik taasissutigineqassanersut, taakku taasissutigineqartassapput siunnersuutigineqaaqartoq taasissutigineqartinnagu.

Imm. 4. Suliaq pillugu taasisitsineq aallartinneqarsimatinnagu, ataatsimiititaliamik pilersitsinissaq pillugu, suliaq siusinnerusukkut ataatsimiititaliamut innersuunneqarnissaa imaluunniit suli ataatsimiititaliami suliarineqarnissaa pillugu siunnersuut saqqummiunneqarsinnaavoq. Suliaq pillugu isumaqatigiinniarnep aallarereernerisa kingorna siunnersuut taama ittoq saqqummiunneqarpat, taakku unitsinneqassapput, tamatumalu kingorna ataatsimiititaliami suliarineqarnissaanut apeqqut kommunalbestyrelsimit aalajangiivigineqassaaq.

Amerlanerussutillit qinersinerat



§ 12. Qinigassanngortittoq borgmesteritut qinigaassaaq taasisut affaanit amerlanerusunit qinerneqaruni (amerlanerussuteqavinneq). Qinigassanngortittuni amerlanerussuteqartoqanngippat nutaamik qinersisoqaqqissaaq. Qinersineq taanna amerlanerussuteqavinnermik pilersitsinngippat qinigassanngortittut amerlanernit taaneqartut marluk akornanni pingajussaanik qinersisitsisoqassaaq. Qinersinermi taasinerit naligiissimappata makitsinikkut aalajangerneqassaaq.

Imm. 2. Amerlanerussuteqartitsilluni qinersinermi qinigassanngortittoq ilaasortanit najuuttunit amerlanerpaanit taaneqartoq qinigaassaaq. Qinigassanngortittuni amerlanerussuteqartoqanngippat nutaamik qinersisoqaqqissaaq. Qinersineq taanna amerlanerussuteqavinnermik pilersitsinngippat qinigassanngortittut amerlanernit taaneqartut marluk akornanni pingajussaanik qinersisitsisoqassaaq. Qinersinermi taasinerit naligiissimappata makitsinikkut aalajangerneqassaaq.

Imm. 3. Kommunimi sulilersussamik atorfinitsitsinermi qinnuteqartut arlallit akornanni toqqaasoqartassaaq periaaseq imm. 1-imi taaneqartoq malillugu.

§ 13. Ataatsimiititalianut il.il. ilaasortassanik marlunnik amerlanerusunilluunniit qinersinermi qanoq amerlassuseqarneq tunngavigalugu qinersineq atorneqassaaq ataatsimiititalianut tamanut.

Imm. 2. Ataatsimiititalianut il.il. borgmesterip pinngitsoorani ilaasortaaffigisassaanut ilaasortassanik qinersinermi borgmesterip pinngitsoornagit inissisimaffissaani inissanut qanoq amerlassuseqarneq tunngavigalugu kommunalbestyrelsimi suleqatigiit borgmesterip ataffigisaata pisassaanut ilanngullugu naatsorsuutigineqartassaaq.

Imm. 3. Ataatsimiititalianut il.il. ilaasortassanik kommunalbestyrelsimi ilaasortat ilaasortaanngitsullu akornanni qinersisoqassagaangat ilaasortat kommunalbestyrelsip toqqagassai tamarmik qinerneqassapput qanoq amerlassuseqarneq tunngavigalugu ataatsimiititalianut tamanut. Suleqatigiit ilaasortaataqartussat tullerriaarlutik kommunalbestyrelsimi ilaasortat



ilaasortaangitsullu toqqartassavaat inissat tamarmiusut inuttalerneqarnissaasa tungaanut.

Imm. 4. Qanoq amerlassuseqarneq tunngavigalugu qinersineq ingerlanneqassaaq d'Hondtip periaasia tunngavigalugu imaattunik malittarisaqarluni: Kommunalbestyrelsip ilaasortai immikkoortunut qinersinissami pineqartumi qanoq taaseqatigiikkumanertik pillugu siulittaasumut nalunaarsimanertik tunngavigalugu avinneqassapput. Suleqatigiit tamarmik amerlassusii 1-imik, 2-mik, 3-mik il.il. agguarneqassapput. Inernerit pissarsiarineqartut aalajangissavaat qanoq tulleriinneqarlutik sinniisorisassaminnik qinersisinnaanersut. Inernerit marluk amerlanerusulluunniit assigiippata qanoq tulleriinneqarnissaq makitsinikkut aalajangerneqassaaq. Suleqatigiit ataasiakkaat sinniisorisassaasa amerlassusissaat aalajangerneqarpat suleqatigiit piaartumik borgmesterimut nalunaarutigissavaat inuit kikkut inissani pisassaminni toqqarneqarnersut. Suleqatigiit arlaata ataatsimik arlalinnilluunniit inuttaliisinnaatitaanini atorumannippagu inissat inuttalerneqanngitsut suleqatigiit allat akunneranni agguarneqassapput periaaseq siuliani taaneqartoq malillugu.

§ 14. Kommunalbestyrelsip aalajangiineri ataatsimiittoqartillugu aalajangiinernut imaqarniliami kommunalbestyrelsip allattaanit allanneqassapput. Borgmesterip aalajangissavaa suut imaqarniliamut ilanngunneqassanersut, oqaluuserisassallu ataasiakkaat naammassineqarnerisa kingornatigut kommunalbestyrelsip aalajangiinera borgmesterimit atuarneqartassaaq.

Imm. 2. Ilaasortani taakkunani kinaluunniit piumasaqarsinnaavoq isummani allaasoq naatsumik aalajangiinermut imaqarniliami allanneqaqqullugu, sulianilu pisortatut oqartussaasunut allanut ingerlateqqitassani piumasarisinnaallugu taassuma aamma imaqarniliap imaanik ilisimatinneqarnissaat. Ilaasortap taassuma suliap nassiunneqarnerani suliaq nammineq isummaminut tunngavilersuutigisaminik ilaqartissinnaavaa. Tunngavilersuutip tunniunneqarfissaanut periarfissamik kingullermik borgmesteri aalajangiisinnaavoq.



Imm. 3. Aalajangiinnermut imaqarniliaq ataatsimiinnerup naammassinerani, ilanngunneqartut imm. 1 naapertorlugu atuarneqarnerisa kingorna, ilaasortanit tamanit ataatsimeeqataasimasunit atsiorneqassaaq. Ilaasortat § 4, imm. 1, malillugu attaveqaatitigut peqataasut atsiorsinnaapput attaveqatigiinnermi teknologii atorlugu. Ilaasortat taasisimanermittut pissutsinullu allanut innersuussillutik allattaavinni atsiorumangissinnaanngillat.

Imm. 4. Imaqarniliap atsiorneqarnerata kingorna kingusinnerpaamik sapaatit akunnerisa marluk qaangiunnerani imaqarniliap nuutinnera borgmesterip Naalakkersuisunut nassiutissavaa.

§ 15. Ilaasortaq kinaluunniit pisussaavoq aqutsinissamik aalajangersakkat qanoq paasineqarnissaannik borgmesterip aalajangiinera utaqqiisaasumik malissallugu, kisianni apeqqut kommunalbestyrelsimut suliassanngortinneqarsinnaavoq taassuma ataatsimiinnissaani tullermi.

Atuutilersitsineq allannguutillu

§ 16. Ukiup tulliani kommunalbestyrelsip ataatsimiiffissanik akuersineq kommunalbestyrelsip ileqquusumik ataatsimiiffiani ukiumut kingullerpaajusumi pisassaaq.

§ 17. Suleriaasissaq manna oktoberip aallaqqaataani 2022-mi atuutilerpoq, siullermeerneqarlunilu maajip ulluisa 24-ianni 2022 aappassaanneerneqarlunilu septembarip ulluisa 28-ianni 2022.

Imm. 2. Suleriaatsimi allannguuteqartitsinerit tapiliussallu ataatsimiititami ileqquusumik marloriarluni ataatsimiinnerni oqaluuserineqassapput.



Kommune Kujalleq
Postboks 514 · 3920 Qaqortoq

Borgmesteri
Stine Egede



Siunnersuummi aalajangersakkanut ataasiakkaanut nassuiaatit:

§ 1.

Imm.1. Aalajangersagaq suleriaatsimi atuuttumi § 1-imut naapertuuppoq kiisalu aqutsinermut inatsimmi § 9, imm. 1-imut naapertuulluni.

Imm. 2. Aalajangersagaq suleriaatsimi atuuttumi § 1, imm. 2-mut naapertuuppoq, tamatumani siunnersuutigineqarpoq suliat nr. 1 - 3-mut attuumassuteqartut ammasumik oqaluuserineqaannarnissaannik kommunalbestyrelsi aalajangiisinnaassasoq.

Matoqqasumik oqaluuserinnittoqarnissaanik apeqqummi suliat nalinginnaasumik ammasumik oqaluuserineqartartussaananerata aallaavigalugu suliani ataasiakkaani kommunalbestyrelsip naliliisussaananerata tamatumani pissutaavoq.

Tassalu nr. 1 - 3-mi taagukkat tassaakkajupput suliat matoqqasumik suliarineqartariaqarfii.

Imm. Aalajangersagaq suleriaatsimi atuuttumi § 1, imm. 3-mut naapertuuppoq, kiisalu aqutsinermut inatsimmi § 9, imm. 1, 2-mut naapertuulluni.

Imm. 4. Aalajangersagaq suleriaatsimi atuuttumi § 6, imm. 4-mut naapertuuppoq.

Imm. 5 Aalajangersagaq suleriaatsimi atuuttumi § 1, imm. 5-mut naapertuuppoq.

Imm. 6. Aalajangersagaq suleriaatsimi atuuttumi § 1, imm. 6-mut naapertuuppoq.

§ 2.

Aalajangersakkap suleriaatsimi § 2 assigaa.



§ 3.

Imm. 1. Aalajangersakkap oqaasertamigut allanngortitaalluni suleriaatsimi atuuttumi § 3, imm. 1 assigaa. Tamatuma saniatigut suliap oqaluuserineqarnissaannik noqqaassutsip borgmesterimut tunniunneqartussaanaera erseqqissarneqarpoq. Aalajangersagaq aqutsinermut inatsimmi §-inik 17 aamma 19-mik tunngaveqarpoq.

Imm. 2. Kommunalbestyrelsip ataatsimiiissutissaasa pitsaasuunissaannik allaffeqarfiup qularnaarinissaanut naammattumik piffissaqarnissaq pillugu, soorlu kalaallisuunngortinneqarsimallutillu danskisuunngortinneqarsimanissaat eqqarsaatigalugu, ataatsimiissutissat kommunalbestyrelsimut nassiunneqarfissaannut piffissarititaasup kingulliup ulluinnaat 14-iniit ulluinnarnut arfineq-marlunnt sivikillineqarnissaa siunnersuutigineqarpoq.

Ilanngullugulu siunnersuutigineqarpoq aalajangersagaq periaatsimut atuuttumut naapertuuttunngorlugu oqaasertalerneqassasoq, taamalu oqaluuserissat ilanngussallu ataatsikkut nassiunneqartalissallutik.

Aqutsinermut inatsimmi § 8, imm. 4 naapertorlugu oqaluuserisassanik kommunalbestyrelsimut ilaasortanut nassiussivissaq pissaaq "ajornanngippat kommunalbestyrelsip ulloq ataatsimiiffissaa ulluinnarnik sisamanik sioqqullugu," paasissutissanilli nassiussinissamut killiuliussaq tassaalluni "ajornanngippat ataatsimiinneq ulluinnarnik pingasunik sioqqullugu".

Imm. 3. Aalajangersagaq suleriaatsimi atuuttumi § 3, imm. 3-mut naapertuuppoq.

Imm. 3. Aalajangersagaq suleriaatsimi atuuttumi § 3, imm. 4-mut naapertuuppoq.

§ 4.



Imm. 1. Aalajangersagaq suleriaatsimi atuuttumik § 4, imm. 1-mik nangitsineruvoq, kiisalu aqutsinermut inatsimmi § 11, imm. 1-mut naapertuulluni.

Aalajangersakkap aqutsinermut inatsimmi atuuttumi § 11, imm. 2-mut naapertuutilernissaa siunertaralugu aamma siunnersuutigineqarpoq attaveqaatitigut peqataasoqartussaattillugu sinniisussamik aggersaanissamut piumasaaqatit naammassineqarsimasariaqarnerat erseqqissarneqassasoq.

Imm. 2. Aalajangersagaq suleriaatsimi atuuttumi § 4, imm. 2-mut naapertuuppoq.

Imm. 3. Aalajangersagaq suleriaatsimi atuuttumi § 4, imm. 3-mut naapertuuppoq.

Imm. 4. Aalajangersagaq suleriaatsimi atuuttumi § 4, imm. 4-mut naapertuuppoq.

Imm. 5. Aalajangersagaq nutaajuvoq, ilanngunneqassasorlu siunnersuutigineqarpoq oqallinnerup nalaani siunnersuutip saqqummiunneqartup ilumut oqaluuserineqarnissaa nalornissutigineqarunnaaqullugu.

Imm. 6. Aalajangersagaq suleriaatsimi atuuttumi § 4, imm. 5-mut naapertuuppoq.

§ 5.

Imm. 1. Aalajangersagaq suleriaatsimi atuuttumi § 5, imm. 1-mut naapertuuppoq.

Imm. 2. Aalajangersagaq suleriaatsimi atuuttumi § 5, imm. 2-mut naapertuuppoq.

§ 6.



Imm. 1. Aalajangersakkap oqaasertamigut allanngortitaalluni suleriaatsimi atuuttumi § 6, imm. 1, kiisalu aqutsinermut inatsimmi § 1, imm. 2, § 10 assigai.

Imm. 2. Aalajangersagaq nutaajuvoq, missingersuutit kiisalu missingersuutaagallartut pillugit siunnersuutit oqaluuserineqarneranni periaasissanik suleriaatsip imaqarnissaanik aqutsinermut inatsisikkut piumasagaat naammassiumallugu ilanngunneqarsimalluni.

Malittarisassat siunnersuutigineqartut suleriaatsimut nalinginnaasumut aqutsinermut inatsisissatut Naalakkersuisut siunnersuutigisaanni oqaatigineqartumut naapertuupput, taakkulu Naalakkersuisut suleriaasiannut nalinginnaasumut ilanngunneqarsinnaassallutik.

Imm. 3. Aalajangersagaq suleriaatsimi atuuttumi § 6, imm. 2-mik nangitsineruvoq, siunnersuutigineqarporli siullermeerinninnerup aappassaaneerinninnerullu akornanni akunnerit minnerpaamik 24-it ingerlaqqaarsimanissaat erseqqissarneqassasoq. Siunnersuummi aaqqinniarneqartoq tassaavoq kommunalbestyrelsip siullermeerininnera unnukkut pisimappat, aappassaaneerinninnerlu aqagukkut ullaakkut pisussaatillugu kommunalbestyrelsimut ilaasortat isumannaatsumik aappassaaneerinninnissamut piffissaqartussaajunnaarnissaat.

Imm. 4. Aalajangersagaq suleriaatsimi atuuttumi § 6, imm. 3-mut naapertuuppoq.

§ 7.

Imm. 1. Aalajangersagaq suleriaatsimi atuuttumi § 7, imm. 1.-mut naapertuuppoq.

Imm. 2. Aalajangersagaq suleriaatsimi atuuttumi § 7, imm. 2-mut naapertuuppoq, taamaattorli "immikkut ittumik pisoqartillugu" mininneqassasoq siunnersuutigineqarpoq tassami kommunalbestyrelsip naliligassarisariaqarmagu ataatsimiititaliamik immikkut ittumik pilersitsisoqassanersoq.



Imm. 3. Aalajangersagaq suleriaatsimi atuuttumi § 7, imm. 3-mut naapertuuppoq, erseqqissarneqarporli ataatsimiititaliap kommunalbestyrelsimut ilaasortanut nassuiaateqarneranissaaq suleriaatsimi § 3-ip aamma atuuttusnaanera.

§ 8.

Imm. 1. Aalajangersagaq suleriaatsimi atuuttumi § 8, imm. 1-mut naapertuuppoq, siunnersuutigineqarporli erseqqissarneqassasoq attummassuteqarpallaarneq pillugu peqataasinnaannginnermut malittarisassat atorneqartussat tassaassammata pisortani suliassat suliarineqartarnerannut inatsimmi §§ 3 aamma 4.

Imm. 2. Aalajangersagaq suleriaatsimi atuuttumi § 8, imm. 2-mut naapertuuppoq.

Imm. 3. Aalajangersagaq nutaajuvoq, kisiannili aqutsinnermut inatsimmi § 14, imm. 4-mut naapertuulluni, kiisalu sinniisussamik aggersaasarnermut malittarisassat erseqqinnerulersikkumallugit suleriaatsimut ilanngunneqarnissaa siunnersuutigineqarluni.

§ 9.

Aalajangersagaq suleriaatsimi atuuttumi § 9-mut naapertuuppoq.

§ 10.

Aalajangersagaq ataatsimut isigalugu suleriaatsimi atuuttumi § 10-mut naapertuuppoq.

§ 11.

Imm. 1. Aalajangersagaq suleriaatsimi atuuttumi § 11, imm. 1-mut naapertuuppoq.



Imm. 2. Aalajangersagaq suleriaatsimi atuuttumi § 11, imm. 2-mut naapertuuppoq, piffissaliussamilli ilaasortap qaangiinerata isiginiarneqannginnissanik kommunalbestyrelsip aalajangiisinnaalernissaanik allanngortinneqassasoq siunnersuutigineqarluni. Suliat marloriarneqartussat naammattumik eqaassusilimmik suliarineqarnissaat qularnaarumallugu taama allannguisoqassasoq siunnersuutigineqarpoq.

Imm. 3. Aalajangersagaq suleriaatsimi atuuttumi § 11, imm. 3-mut naapertuuppoq.

Imm. 4. Aalajangersagaq suleriaatsimi atuuttumi § 11, imm. 4-mut naapertuuppoq.

§ 12.

Imm. 1. Aalajangersagaq aqutsinermut inatsimmi § 6, imm. 1-mut naapertuuttunngorlugu allanneqassasoq siunnersuutigineqarpoq qanoq nassuiarneqarnissaanik nalornissuteqartoqaaqqunagu.

Imm. 2. Aalajangersakkap § 12, imm. 2-mut sanilliullugu allanngortinneqarnissaa siunnersuutigienqarpoq taamaalilluni aqutsinermut inatsimmi § 36, imm. 1-mut, pingasoriarluni taasisitsisoqarnissaanik aalajangersaaffiusumut naapertuutilersussanngorlugu.

Imm. 3. Aalajangersagaq suleriaatsimi atuuttumi § 12, imm. 1-ip immikkoortuata aappaanut naapertuuppoq, erseqqissarneqarporlu atorfinitsitsineni qinersineq aatsaat pisariaqartartoq qinnuteqartut qassiit akornanni qinersisoqartussaattillugu.

§ 13.

Imm. 1. Aalajangersagaq suleriaatsimi atuuttumi § 13, imm. 1-mut oqaasertamigut iluarsisaalluni naapertuuppoq.



Imm. 2 - 4. Aalajangersagaq suleriaatsimi atuuttumi § 13, imm. 2-mut taartaavoq, siunnersuutigineqarporlu aqutsinermut inatsimmi atuuttumi § 36-mut naapertuuttunngorlugu oqaasertalersorneqassasoq aqutsinermut inatsit naapertorlugu qanoq paasineqarnissaanik nassuiaanermi paatsuungasoqaqqunagu.

§ 14.

Imm. 1. Aalajangersagaq suleriaatsimi atuuttumi § 14, imm. 1-mut naapertuuppoq, kisiannili periaaseq atorneqartoq, tassa oqaluuserisassat ataasiakkaat naammassineqarnerini tamani aalajangerneq atuarneqartarluni, suleriaatsimi aalajangersakkamut atuuttumut ilanngunneqarnissaa siunnersuutigineqarpoq.

Imm. 2. Aalajangersagaq suleriaatsimi atuuttumi § 14, imm. 2-mut naapertuuppoq, siunnersuutigineqarporli aqutsinermut inatsimmi § 16, imm. 1-mut (siusinnerusukkut § 14-iusumut) innersuussineq pinnagu aalajangersakkap taassuma imarisai issuarneqassasut. Tamatuma saniatigut suliap suliarineqarnissaa eqqarsaatigalugu tunngavilersuummik tunniussinissamut borgmesterip kingusinnerpaaffiliisinnaneranik malittarisassamik ilanngussisoqassasoq.

Imm. 3. Aalajangersagaq suleriaatsimi atuuttumik § 14, imm. 3-mik nangitsineruvoq, kisiannili aqutsinermut inatsimmi § 16, imm. 3 naapertorlugu ilaasortat attaveqaatit atorlugit peqataasimasut atsiortarnerat pillugu immikkut aalajangersakkamik ilaneqarput.

Immi. 4. Aalajangersagaq suleriaatsimi atuuttumi § 14, imm. 4-mut sanilliullugu oqaasertai allanngortitaapput, ilaatigut oqaaseqatigiiliornikkut aaqqitaallutik ilaatigullu imaqarniliat Nakkutilliisoqarfimmut piinnaarlutik Naalakkersuisunut nassiunneqartalernissaat iluarsiiisutigineqarluni, tak. aqutsinermut inatsimmi § 16, imm. 4.

§ 15.

Aalajangersagaq suleriaatsimi atuuttumi § 15-mut naapertuuppoq.



§ 16.

Atuutilerfissaa ukiortaap aallartinnerata nalaani pissasoq
siunnersuutigineqarpoq.

Nutaarsiassatut sinniisunik aggeqqusisarnermut malittarisassat
atuutsilersinnissat siunnersuutigineqarpoq, kommunabestyrelsimut sinniisunik
aggeqqusisarnernut malittarisassanut naapertuuttunik.

§ 5.

Imm. 1, § 4, imm. 2, uniffik siullermik atuuttumik ingerlateqqiineruvoq.

Imm. 2. ilaasortaq ataatsimiinermmi torersumik pissuseqaqqullugu marloriarluni
erseqqissaavigineqareeraluarluni torersumik pissusilersulinngippat
kommunalbestyrelsip ilaasortamik ataatsimiinnerup sinnerani
oqaaseqarsinnaajunnaarsitsisinnaaneranik aalajangersagaavoq nutaaq,
Aalajangersakkap annermik pinaveersaartitsinermik sunniuteqarnissaa
naatsorsuutigineqarpoq, taamaaliornikkut kikkut tamarmik ataatsimiinnerit
tunngavissaqarluartumik ingerlanneqarnissaannik tatiginnissammata.
Ilaasortap oqaluuserisassat toqqammaviginngippagit imaluunniit ilaasortap
oqaasii naleqqutinngippata aalajangersakkap atorneqarnissaa
eqqarsaatigineqarsinnaavoq.

§ 6.

Aalajangersagaq suleriaatsimi atuuttumi § 5-mut naapertuuppoq.



§ 7.

Aalajangersagaq suleriaasissami atuuttumi § 9-mut naapertuuppoq, immikkoortumulli ataatsimiinnermi aqutsinermut tunngasumut naapertuunnerummat nuunneqarpoq.

§ 8.

Imm. 1-ip suleriaasissami atuuttumi § 6, imm. 1 ingerlateqqippaa, ilanngullugu suliami piviusumi peqataasinnaannginnermut tunngasut sullissinermut inatsimmi §§ 3 aamma 4 naapertorlugit naliligassaanersut erseqqissarpai.

Imm. 2 inatsimmi atuuttumi § 6, imm. 2-mut naapertuuppoq.

Suleriaasissami atuuttumi § 6, imm. 3-mi aalajangersakkami nunaqarfiup allaffiani sulisut nunaqarfiit aqutsisuinut ilaasortaasinnaannginnerannut tunngasup mininneqarnissaa siunnersuutigineqarpoq, aalajangersagaq nunaqarfiit aqutsisuisa suleriaasiannut tunnganani kommunalbestyrelsimut qinigaasinnaatitaanermut tunngammat.

Imm. 3 nutaajuvoq sinniisumillu aggersaanissamut periarfissiilluni, aamma kommunalbestyrelsip ataatsimiinnerinut peqataasinnaannginnermut assingusumik pisoqartillugu, tak. aqutsinermut inatsimmi § 14, imm. 4. Nalinginnaasumik ilaasortap ataatsimiinneq sioqqullugu suliami ataatsimi arlalinniluunniit peqataasinnaannginnini nalunaarutigippagu, sinniisup aggersarneqarnissaa naatsorsuutigineqartarpoq. Tamatuma kingorna sinniisup suliap imaluunniit suliat eqqartornerini tunngaviatigut peqataasinnaalissaaq, suliap sulialluunniit kinguartinnissaat piumasarineqangikkaluarluni.

Imm. 4 suleriaasissami atuuttumi § 7-mut naapertuuppoq.